



JUDICIAL SYSTEM MONITORING PROGRAMME

PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu :Outubru 2011

Edisaun: 27 Outubru 2011

JSMP realiza Semináriu Nasionál Konabá Kna'ar Parlamentu entre Membru Parlamentu ho Lider Komunitariu

Iha loron 24 Outubru 2011, JSMP liu husi Sub Unidade Projeto Observasaun Parlamentu (POP) organiza Semináriu Nasionál ida ho tema **“Kna'ar Parlamentu Nasionál Relasiona ho Podér Lejislativu, Podér ba Fiskalizasaun no Desizaun Polítika”**. Seminariu ne'e sei sai hanesan diskusaun aberta entre Membru Parlamentu Nasionál ho autóridade komunitariu ne'ebé hanesan mós sira nia konstituante.

Oradór sira husi semináriu ne'e mak membrus Parlamentu nian, ne'ebé representa husi bankada Aliansa Maioria Parlamentar (AMP), representa direktamente husi Vice Prezidente Parlamentu Nasionál, Sr. Vicente da Silva Guterres, husi Bankada no bankada opozisaun sira.

Seminariu ne'e sei partisipa husi autóridade komunitariu sira husi Distritu Viqueque (1), Distrito Manatuto (5), Distrito Liquica (5) no Distrito Bobonaro (18). Autóridade komunitariu hirak ne'e, mak durante ne'e JSMP servisu hamutuk iha periodu tinan 2011 nia laran.

Seminariu ne'e organiza ho objetivu kontinua fasilita povu atraves husi autóridade lokal sira hakbesik ba Parlamentu Nasionál atu disponivel espasu/fatin hodi deskuti direktamente sira nia preokupasaun, realidade no perspetiva hamutuk ho sira nia representante sira iha Parlamentu Nasionál. Forum ne'e fornese oportunidade atu buka hatene besik liu tan saida los mak Parlamentu Nasionál nia kna'ar iha Parlamentu Nasionál durense periodu lejislativu ida ne'e no ba futuru.

Fokus partisipante sira iha semináriu ida ne'e ba liu lideransa komunitáriu sira, tanbá JSMP hanoin katak sira hanesan mata dalan ba comunidade presija iha koñesimentu ne'ebé diak konabá kna'ar lejislativu nian, hahú husi sira nia podér, prosesu halo fiskalizasaun to'ó podér ba foti desizaun polítika.

Luis de Oliveira Sampaio nu'udar Diretór ba JSMP hateten katak, *forum ida ne'e importante tebetes tanbá disponivel autóridade komunitariu sira hasoru no koalia direktamente sira nia situasaun ho representante povu husi Uma Fukun Parlamentu Nasionál.*

“Ne'e forum ba segunda-ves ne'ebé JSMP organiza durante periodu legislativu ida ne'e, atu fasilita no hakbesik povu ba representante povu sira iha Parlamentu Nasionál,

Semináriu ne'e realiza tanbá hetan apoiu husi The Asia Foundation no USAID no Partisipantes sira mai husi área rurál nomós suco balun iha Dili laran, ne'ebé mak JSMP identifika nu'udar grupu benifisiáriu ne'ebé falta informasaun konabá kna'ar Parlamentu Nasionál nian.

Oradór ba semináriu ne'e mak Membrus Parlamentu, ne'ebé representa husi bankada Aliansa Maioria Parlamentar (AMP) no bankada opozisaun sira no sei iha abertura husi Vice Presidente Parlamentu Nasionál Sr. Vicente Guterres ne'ebé sei sai mós hanesan oradór.

JSMP hein katak liu husi diskusaun aberta hanesan ne'e, membrus Parlamentu Nasionál bele hatene diak liu tan nesesidade báziku povu nian, atu nune'é bele produs lei ne'ebé iha kualidade ne'ebé aas no refleta duni povu nia moris no situasaun réal Timór Léste ninian. JSMP mós hein katak, diskusaun aberta sira hanesan ne'e, bele haboot liu tan povu nia koñesimentu konabá sira nia representante sira nia kna'ar no bele hatene liu tan, oinsá povu bele partisipa ativu iha prosesu lejislativu nian, iha nasaun demokrasia nia laran.

Iha tinan 2011 nia laran JSMP hala'ó ona dizaminasaun informasaun no workshop konabá kna'ar Parlamentu Nasionál iha área balun, hanesan iha Distritu Viqueque no Bobonaro. Antes ne'e iha 2010 hala'ó ona iha Distritu Oe-cusse, Manatuto, Ermera Aileu, Kovalima no Bobonaro.

Iha semináriu ne'e, deputadu sira sei hatan ba perguntas konabá sira nia kna'ar, prosesu legislativu, prosesu fiskalizaun no prosesu foti desizaun polítika. Partisipantes sira sei iha oportunidade atu husu ka hato'ó sira nia perguntas no fó hatene sira nia hanoin ba sira nia representantes.

Atu hetan informasaun kle'an favor kontaktu direktamente:

Luis de Oliveira Sampaio

Diretór Ezekutivu JSMP

Diresaun e-mail: luis@jsmp.minihub.org

Landline: 3323883/7295795